

Ullut ataatsimiiffiusut aqqaneq tallimaat, tallimanngorneq 23. oktober 2009.

Immikkoortoq 62

Kalaallit Nunaanni meeqqat angerlarsimaffiup avataani inissinneqartut, sullinneqarnerisa nakkutigineqarnerat sukateriffigineqaqqullugu Naalakkersuisut suliaqaqqullugit Inatsisartut aalajangiiffigisassaattut siunnersuut.

(Atassutip Inatsisartuni ilasortaataitai)

(Siullermiigassaq)

Ataatsimiinnermi aqutsisut:

Finn Karlsen, Siulittaasup tulliata pingajuat, Atassut

Justus Hansen, Siulittaasup tulliata sisamaat, Demokraatit.

Finn Karlsen, Siulittaasup tulliata pingajuat (A)

Taava massakut immikkoortoq 62-imut ingerlaqqissaagut, taanna Atassutip gruppiani siunnersuutigineqarpoq.

Saqqummiunneqassaaq Siverth K. Heilmann-imit. Takanna.

Siverth K. Heilmann (A)

Qujanaq Siulittaasoq.

Meeqqanik inuusuttunillu ikiorsiisarneq pillugu Inatsisartut peqqussutaat nr. 1 15. april 2003-meersoq kingusinnerusukkullu allanngortinneqartoq, naapertorlugu ulloq uannuarlu paaqqinniffiit ingerlanneqarneri, aningaasatigut aqunneqarneri aammalu perorsaanikkut sullissinerit pillugit Naalakkersuisut nakkutilliisussaapput.

Ulloq unnuarlu angerlarsimaffiit pisortat pigalugillu ingerlassaasa, saniatigut suliffeqarfiit imminnut pigisutut ingerlasut, arlaqaleriartortut. Neqerooruteqartarput meeqqanik inuusuttunillu angerlarsimaffiup avataanut inissinneqartussamik inissiumallutik.

Taamatut ineriartortoqarnera Atassummiit ippinnartoqartinngilarput. Taamaattorli aamma pingaartipparput, sutigut tamatigut qulakkeersimaneqassasoq, meeqqat inuusuttullu angerlarsimaffiup avataanut inissinneqarsimasut sullinneqarnerisa pitsaanerpaatinneqarnissaa.

Suliffeqarfiit namminersortut amerliartortut meeqqanik inuusuttunillu ajornartorsiuteqartunit inissiivittut atorneqaleriartorlutillu, tamatuma ilutigisaanik inatsisitigut toqqammavigineqartut ersarissarneqarlutillu sukaterneqartarnissaat Atassummiit pissusissamisoorsoraarput.

Eqqaamaneqartariaqarpormi meeqqat inuusuttullu angerlarsimaffiup avataanut inissinneqartariaqartartut, inuunerminni aqqusaagaat imaannaanngitsuusarmata, allaallu meeqqat inuusuttullu ilaat imminnut inoqatiminnullu ulorianartorsiortitsisinnaassuseqalersarmata.

Taamaammallu siunertaqarluinnartumik aamma qaffasissumik pitsaassusilimmik sullinneqartariaqartuummata.

Taamaammat Atassummiit matumani minnerpaatut piumasaraarput, makkua naammassineqassasut:

Siulermik, meeqqanut inuusuttunullu ulloq unnuarlu inissiivinnut piumasaqaatit sukaterneqassasut, ersarissarneqarlutillu.

Aappaattut, Naalakkersuisut nakkutilliisussaatitaanerat ersarissarneqassasoq.

Pingajuattullu, peqqussut malillugu meeqqat pillugit paasisimasalittut qitiusumik Ataatsimiititap suliassai ersarissarneqassasut.

Taamatut tunngavilersuuteqarluta siunnersuut Inatsisartunut suliassanngortipparput.

Finn Karlsen, Siulittaasup tulliata pingajuat (A)

Qujavugut siunnersuuteqartup saqqummiussineranut.

Taava tullinnguulluni oqaaseqassaaq, Isumaginninnermut Naalakkersuisoq.

Maliina Abelsen, Isumaginninnermut Naalakkersuisoq (IA)

Siunnersuummut pisunut attuumassuteqartumut Naalakkersuisunit pingaartinneqarlunnartumut qujavugut.

Siunnersuuteqartup apeqqutigisaanut uunga "meeqqanut inuusuttunullu ulloq unnuarlu inissiivinnut piomasaaqatit sukaterneqassasut ersarissarneqarlutillu" tassani ulloq unnuarlu paaqqiffinnik nalinginnaasumik nakkutilliisarneq aallaaveqarpoq peqqissaartumik akuersissutiginninniarluni suliamit, tassani Naalakkersuisoqarfiup ingerlaavartumik nakkutilliisarnera, tamatuma kingornatigut piomasaaqatinit inissiivigineqartup akuersissuteqaataanit tunngaveqartoq. Piomasaaqatinit taakkunannga ersarissaanissamut tunngatilugu oqaatigineqassaaq, Isumaginninnermut Pisorta qarfiimmit ulloq unnuarlu paaqqinniffinnik imminnut pigisunik pilersitsinermi periutsit ersarissarneqalersimmata aammalu paaqqinniffinnik nutaanik akuersissutiginninnermut atatillugu tamakku pillugit ilitsersuutit nutaat 2009-ip ingerlanerani piareerneqassallutik.

Apeqqummut Naalakkersuisut nakkutilliisussaataa nerat ersarissarneqassasumut, aallarniutigalugu oqaatigineqassaaq, nakkutilliilluni suliaassami pineqartarmata immikkut meeqqamik nakkutiginninneq aammalu inissiiviusumit nalinginnaasumik nakkutiginninneq (immikkoortortakkuutaartumik nakkutilliineq). Immikkut nakkutiginnittarneq kommuninit isumagineqartartussaavoq meeqqamullu iliuusissatut pilersaarutit malittarlugit, meeqqanut inuusuttunullu ikiorsiisarneq pillugu Inatsisartut peqqussutaat aallaavigalugu. Nalinginnaasumilli nakkutiginnittarneq Isumaginninnermut Naalakkersuisoqarfiimmit isumagineqartarluni. Nakkutilliinerit marluusut tamarmik siunertaraat meeqqamut inuusuttumullu angerlarsimaffimmini najugaqarsinnaanngitsumut sapinngisamik pitsaanerpaamik inuuneqarnissaata qulakkeerneqarnissaa, taamaattumillu angerlarsimaffiup avataanut inissinneqartariaqarluni.

Ulloq unnuarlu paaqqinniffinnik aamma kommuninit nalinginnaasumik nakkutiginnittarnermi ilaatigut ilaatinneqarput ingerlaavartumik suleqatigiinneq, ilaatigullu aaqqissuussaasumik nakkutiginnittarneq, tamakku Naalakkersuisoqarfiimmit nammineq ulloq unnuarlu

paaqqinniffiutigisanut aamma paaqqinniffinnik imminnut pigisunut ingerlanneqartarput, taakkualu ingerlatsineq pillugu isumaqatigiissuteqarfigineqarsimapput.

Naalackersuisut pingaarnertut nakkutilliisussaataanerini suliassami malittarisassaq aamma nassaarineqarsinnaavoq Isumaginnittoqarfiup aqunneqarnera aaqqissuussaanelu pillugit Inatsisartut peqqussutaani “§ 1-imi. Naalackersuisut Kalaallit Nunaanni isumaginnittoqarfiup allaffissornikkut aqunneqarnera siulersorlugulu aaqqissuutissavaat, isumaginninnermilu malittarisassanik kommunit ingerlatsinerat nakkutigisaralugu”. Naalackersuisut isumaginnittoqarfimmi ingerlatsinermit nakkutilliisuunerat nalinginnaasumik immikkoortortamit nakkutilliineruvoq, taannalu taamaallaat eqqartuussisarnikut malittarisassanik qulangerneqarsimalluni, taakku kinguneraat, ingerlatsiviup malittarisassai annertunerpaatigut kommuninit isumagineqartussaanelat, aammalu naammagittaalliorfiusinnaasoq Isumaginninnikkut Maalaartarfimmut isumagisassanngortinneqarsimalluni.

Aalajangiiffigisassatut siunnersuummi oqaatigineqarpoq: “inissiinermi siunertaqarluinnartumik aammalu qaffasissumik pitsaassusilimmik sullinneqartariaqartuummata”.

Nalinginnaasumik qulaani immikkoortortamit nakkutilliinerup ilaatut imaappoq, Naalackersuisut pisussaaffeqartut kommunini suliat aalajangersimasut misissornissaannut ilaatigut nakkutilliiartorluni angalanernut atatillugit aamma suliat aalajangersimasut saaffiginnissutigineqarnerinut atatillugu. Naalackersuisoqarfiup nakkutilliisussaataaneranut naapertuuttumik sulianik tamakkuninnga aalajangersimasunik misissuinerni, qularnaarneqassaaq isumaginninnikkut malittarisassanik kommunit ingerlatsinerinit nakkutilliinerup pitsaasuunissaa, taakkununnga ilanngullugit ilaatigut meeqqanut ataasiakkaanut iliuusissatut pilersaarutit ilaasartut aammalu immikkut kommuninit nakkulliinerup ilagisai.

Inatsisartut Ombudsmandiat aamma apeqqummut soqutiginninnermik takutitsisimavoq, Naalackersuisoqarfillu nakkutilliisussaataaneq pillugu Ombudsmandimut akissuteqaasiuleruttoq. Aammattaaq apeqqut erseqqissaavigineqarsimavoq Ombudsmandeqarfiup nittartagaatigut.

Ilanngullugu Atassummit kissaatigineqarpoq: ”Peqqussut malillugu meeqqat pillugit paasisimasalittut qitiusumik ataatsimiititap suliassai ersarissarneqassasut”.

Meeqqat inuusuttullu pillugit Inatsisartut peqqussutaani meeqqat pillugit paasisimasalittut qitiusumik ataatsimiititaliamut tunngasut malittarisassat erseqqippat. Ataatsimiititaliamit pingaarnerusutigut suliaq unaavoq, suliani oqaaseqaasiussalluni, taakkunani meeqqap ulloq unnuarlu paaqqinnittarfimmit imaluunniit inuussutissarsiutigalugu ilaqutariinni paaqqutarininnermit angerlartinneqartarnerini isumaqatigiinngittoqartillugu. Piffissalli takutissimavaa, aalajangersakkat atorineqartartuunngitsut, tassami pisariaqartitsineq annikitsuararsuummat.

Naggasiullugu oqaatigineqassaaq, Naalakkersuisoqarfik nakkutilliinnermut suleqatigiissitaliorsimammat, taanna ingerlaavartumik Naalakkersuisoqarfiup nakkutilliilluni sulineranit nalilersuisartuusaaq tamatuma pitsaanerpaatinneqarnissaa siunertaralugu, tassunga ilanngullugit ilaatigut nakkutilliinnermi periutsit pitsaanngorsarneqarnissaannut missingiuusiornissaq kiisalu Inatsisartut Ombudsmandiata Naalakkersuisut isumaginninnikkut oqartussaasutut pisussaaffii pillugit oqaaseqaatinit malinnaaviginnittartussaalluni.

Nakkutilliisarnermik annertusaaqqittoqassappat pisariaqartitat qulaajaaffigineqarnissaat pisariaqassaaq aningaasatigullu kingunerisassai ilanngullugit. Suliniarneq tamanna meeqqat inuusuttullu pillugit peqqussutip aamma isumaginnittoqarfiup aqunneqarnera aqqissuusaaaneralu pillugit peqqussutit pillugit aqqissuusseqinnermi pilersaarutaareersumi ilanngunneqarumaarpoq.

Maanaakkut Naalakkersuisut oqaatigisinnaangikkallarpat aqqissuusseqinneq taamaattoq qaqugu naammassineqarumaarnersoq, taamaattumik Naalakkersuisunit kaammattuutigineqassaaq siunnersuut taamatut isikkoqartillugu akuersissutigineqassanngitsoq.

Taamatut oqaaseqarlunga siunnersuut Inatsisartunut akuersaartumik suliassanngortippara.

Finn Karlsen, Siulittaasup tulliata pingajuat (A)

Qujavugut Maliina Abelsen, Isumaginninnermut Naalakkersuisoq, Inuit Ataqtigiiit.

Taava massakkut partiit oqaaseqartuinnut, siulliusaaq Inatsisartuni ilaasortaq Jane Petersen, Inuit Ataqtigiiit, takanna.

Jane Petersen (IA)

Qujanaq.

Siullermik oqaatigissavara saqqummiusaaq manna Kattusseqatigiit Partiiat peqatigalugu saqqummiussaammat.

Peqqussutikkut sukaterinissamik siunnersuutip aallaavia, pingaartumik angerlarsimaffiit nammineq ingerlasut eqqarsaatigalugit isumaqatigaarput, sukaterinissarlu piffissamik annertuumik atuiiffiusariaqartoq aamma erseqqissaatigisariaqarlutigu.

Naalakkersuisup akissuteqaammini ilaatigut oqaatigaa, meeqqanut inuusuttunullu ulloq unnuarlu angerlarsimaffinnut, minnerunngitsumik imminnut pigisunik pilersitsinermi piomasaaqatit periutsillu pillugit ersarissaaneq aallartissimammat suliallu 2009-ip ingerlanerani piareerneqarnissaa naatsorsuutigineqartoq. Tamanna iluarisimaaratsigu nalunaarutigissavarput.

Pineqartunik nakkutilliinikkut annertusaanissamut sukaterinissamullu tunngasortai pillugit aningaasartaqanngitsoorsinnaannginnerat ilimagisariaqartoq oqaatigissavarput. Tamanna aamma Naalakkersuisup akissuteqaammini oqaatigaa. Taakku pillugit qulaajaasoqartariaqarnera pisariaqassaaq piffissarlu pisariaqartoq atorneqartariaqartoq isumaqarluinnarpugut.

Isumaginninnermut Naalakkersuisoqarfik ingerlaavartumik sulisussamik suleqatigiissitaliorsimavoq suliassallu siunnersuummut aamma attuumassuteqartut massakkut suliarineqarlutik ingerlallutik. Tamanna iluarisimaarparput qilanaarpugullu suleqatigiissitap inerniliussaannik takunissatsinnut.

Qulaajagassat annertuut pisariaqartullu siunnersuutigineqartup aamma suliarinissaanut piffissaq pisariaqartitaq atorlugu ingerlanneqartariaqarpoq, suliassaq pingaarutilik piffissaqarluarluni ingerlanneqartariaqanngimmat.

Qulaani oqaatigisagut aamma toqqammavigalugit Naalakkersuisut kaammattuutaat, tassalu siunnersuutip taamatut isikkoqarluni akuersissutigineqannginnissaa, Inuit Ataqaatigiinnit Kattusseqatigiit Partiianniillu taparserparput.

Finn Karlsen, Siulittaasup tulliaata pingajuat (A)

Qujavugut Inuit Ataqtigiit saqqummiisuanut, Inatsisartuni ilaasortaq Jane Petersen. Inuit Ataqtigiit saqqummiisuanut oqaaseqartoqarumanerluta ? Inatsisartuni ilaasortaq Naja Petersen, Atassut, takanna.

Naja Petersen (A)

Qujanaq, Inuit Ataqtigiit oqaaseqartuanut, Inatsisartuni ilaasortaq Jane Petersen-imut apeqqutigilaarusullugu oqaaseqarnissi naggataani taamatut isikkoqarluni akuersissutigineqannginnissaa innersuussutigivarsi, tassani Maliina Abelsen, Isumaginninnermut Naalakkersuisup, Inuit Ataqtigiit, oqaaseqaatimini aalajanngersimanera aallaavigalugu.

Kisianni Maliina Abelsen, Isumaginninnermut Naalakkersuisup, Inuit Ataqtigiit, oqaaseqarnermini ilaatigut oqaaseqaatip naggaterpiaata qulaatunginnguani itigartitsinissamik innersuussuteqarsimariarluni isummani allannngortissimarpasillugu naggaserpaa akuersaartumik Inatsisartuni suliassanngortinneqassasoq, taanna ilissi qanoq sumi inissisimaffigivisiuk ?

Finn Karlsen, Siulittaasup tulliaata pingajuat (A)

Qujanaq, oqaaseqartoq Inatsisartuni ilaasortaq Jane Petersen, Inuit Ataqtigiit, takanna.

Jane Petersen (IA)

Qujanaq, uagut Inuit Ataqtigiinniit isumaqarpugut suliassaq ingerlasoq pisariaqartoq Naalakkersuisut taanna suliassat ingerlareersut assigiinngitsut, taavalu qulaajarneqartussat piffissamik atuiffiusussasut. Tassani qulaajaqqaartillugu taanna inassutip peqqussutip allannngortinnissaa pisariaqartoq, taamaattumik taamatut isikkoqartillugu akuerinngilarput uagut.

Finn Karlsen, Siulittaasup tulliaata pingajuat (A)

Taamaasilluta Inuit Ataqtigiit oqaaseqartuat Inatsisartuni ilaasortaq Jane Petersen qutsavigivarput.

Tullinnguulluni oqaaseqassaaq Siumup oqaaseqartussaa, Inatsisartuni ilaasortaq Ruth Heilmann, takanna.

Ruth Heilmann (S)

Qujanaq Siulittaasoq.

Atassummit siunnersuutigineqartoq tunngaviatigut Siumumit paasilluarparput.

Meeqqat inuusuttullu angerlarsimaffiup avataanut inissinneqartartut atugaat imaannaanngitsutut aamma oqaatigineqarmat. Angerlarsimaffik, angajoqqaat qatanngutit ilaquuttat inuunermilu sorlaqarfusoq qimallugu allamut nuutitaalluni aallartitaasariaqartarnek pineqartumut qimataasunullu inuttut sakkortuumik misigiffiusarnera imaannaanngitsuusoq tamatta takorloorsinnaavarput.

Taamaattumik meeqqanut inuusuttunullu ikiorsiissuteqarnermi inatsit tunngavigalugu angerlarsimaffiup avataanut inissinneqartariaqartarnek meeqqamut inuusuttumullu angerlarsimaffimmini najugaqarsinnaanngitsumut sapinngisamik pitsaanerpaamik inuuneqarnissaata qulakkeerniagaavoq.

Taamaakkamilu Inatsisartut meeqqanut inuusuttunullu ikiorsiisarnermi peqqussutaat malillugu ulloq unnuarlu angerlarsimaffiit aqunneqarnissaat pisariaqarpoq. Tassani kommunit nalinginnaasumik nakkutiginnittarnermi ilaatinneqartussaapput soorunami inissinneqarsimasunut akisussaanertik tamakkiisoq pigimmassuk. Meeqqap angerlarsimaffigisaanut ajornartorsiutit piusut aaqqiivigineqarnissaat anguniarlugu suliniutit ingerlaneqartussaapput. Meeqqallu sullinneqarnissaanut pilersaarutigineqartut akisussaasuni tamaginni malinnaaffigineqarluarnissaat pisussaaffiuvoq pingaaruteqartorujussuaq. Tassanilu Namminersorlutik oqartussani aamma nakkutiginnittussaataaneq taakkunuunatigut assinganik pisusaaffiuvoq pingaaruteqarluinnartoq.

Taamaammat meeqqap angerlarsimaffiup avataanut inissinneqartarnerata sivikinnerpaaffianiitinnissaa pingaartuuvoq sulissutigiuartariaqarmat meeqqap angerlarsimaffimminut isumannaatsumik uteqqinnissaa siunertaajuartariaqarmat.

Siunnersuummi pineqarpoq ulloq unnuarlu angerlarsimaffiit pisortat pigalugillu ingerlassaasa saniatigut suliffeqarfiit imminut pigisutut ingerlasut arlaqaleriartortut meeqqanik inuusuttunillu ulloq unnuarlu inissiisarfiittut atorneqaleriartormata, taamaattumillu Inatsisartut peqqussutaat nr. 1, 15.april 2003-meersoq suli sukateriffiusariaqartutut Atassummiit isumaqarfingineqarpoq.

Ilaatigut annerusumik Naalackersuisut nakkutilliisussaataitanerat, aammalu peqqussut malillugu meeqqat pillugit paasisimasalittut qitiusumik ataatsimiititap suliasai ersarissarneqassasut. Sutigut ajornartorsiuteqartoqarmat sukaterinissaq sooq pisariaqalersimanerpa, tamanna siunnersuummi ersarissumik oqaatigineqanngimmat Siumumit itisiliinissamik pisariaqartitsivugut. Siumumillu isumaqarpugut itisiliisoqareernerani siunnersuut aatsaat tamakkiisumik isummerfigisinnaalissagatsigu oqaatigissavarput.

Naalackersuisut akissuteqarput nakkutilliinermut suleqatigiissitaliamik pilersitsisimallutik, siunertarineqarluni nakkutilliinermi periutsit pitsanngorsarneqarnissaanut missingersuusiornissaq ingerlanneqassammat. Kiisalu aamma inatsisartut ombudsmandiata Naalackersuisut isumaginninnikkut oqartussaasutut pisussaaffii pillugit oqaaseqaatinit malinnaaviginnittartussaalluni. Tassani Naalackersuisoq itinerusumik suleqatigiissitaliaq pillugu nassuiaanissaa Siumumit pisariaqarsoraarput.

Nakkutilliisarnerminngooq annertusaaqqittoqassappat pisariaqartitat qulaajaaffigineqarnissaat pisariaqassasoq Naalackersuisup oqaatigaa. Aammalu oqaatigalugu meeqqat inuusuttullu pillugit peqqussutip kiisalu isumaginnittoqarfiup aquneqarnera aaqqissuussaaneralu pillugit peqqussutit pillugit aaqqissuusseqqinnermi pilersaarutaareersumi ilanngunneqarumaarnerat aamma Naalackersuisumit neriorsuutaalluni. Kisiannilu aamma oqaatigineqarluni Naalackersuisut oqaatigisinnaanngikkallaraat aaqqissuussineq taamaattoq qaqugu naammassineqarumaarnerasoq.

Tamakkua tamaasa saqqummiunneqartut tunngavigalugit pissutissaqarluarpoq siunnersuutip Isumaginninnermi Ataatsimiititaliami nalilersorluarnissaa Siumumit piumasarissallugu.

Finn Karlsen, Siulittaasup tulliaata pingajuat (A)

Qujavugut Siumut saqqummiussisuanut Inatsisartuni ilaasortaq Ruth Heilmann-imut. Ruth Heilmann saqqummiussineranut tunngatillugu oqaaseqartoqarumanerluni ? Taamaattoqanngilaq, taamaammat Ruth Heilmann qutsavigissavarput.

Tullinnguulluni oqaaseqassaaq Inatsisartuni ilaasortaq, Astrid Fleischer Rex, Demokraatit, takanna.

Astrid Fleischer Rex (D)

Qujanaq.

Pissusissamisoorpoq uagut Inatsisartut nakkutigissagatsigu inatsisit pissutsinut malinnaanersut.

Apeqqutaangilluinnarpoq matumani peqqussutit sorliit eqqartorneqarnersut. Inatsisit pissutsinut pissusiviusunut naleqqussarneqartuartaappaat.

Inatsisartut siorna kisitsisitalerlugu ilisimatinneqarpugut, meeqqat inuusuttullu 1300-t missaannik amerlassusillit angerlarsimaffiup avataanut inissinneqarsimasut. Meerartatta akornanni meerarpassuupput arlaatigut sakkortuumik misigisaqartinneqarsimasut, ukiorpassuit ingerlanerini aatsaat iluarsineqarsinnaasunik – iluarsineqarsinnaappata. Taamaattumik inuiaqatigiinnut pingaaruteqartorujussuuvoq, meeqqat tamakku inersimasunngornissaannut kusanartumik ikorfartornissaat.

Atassut siunnersuumminut tunngavilersuutimini allappoq, partiip pissusissamisoortutut isigigaa, inatsisit imaasa ersarissarnissaat sukaternissaallu, ulloq unnuarlu angerlarsimaffiit namminersortunit pigineqartut atorneqarnerulersimanagerat pissutigalugu.

Demokraatini taaneqareersut tunngavigalugit isumaqatigaarput, nakkutilliineq sakkortusarneqartariaqartoq. Demokraatini siunnersuummut paasinninnerput naapertorlugu, perorsaannermut tunngasortaa ersarissarneqassaaq ulloq unnuarlu angerlarsimaffinnit tamanit nalunaarutigineqaqqusaassalluni, tamakku inuusuttunut assigiinngitsunut inissinneqartariaqarsimasunut perorsaariaatsit qanoq ittut atorniarneraat. Tamanna pisassaaq angerlarsimaffik Namminersorlutik Oqartussanit akuerineqartinnagu.

Demokraatit Naalakkersuisut kaammattorusuppaat tamanna nalunaarummi ersarissaqqullugu.

Siunnersuut Ilaqutariinnermut Ataatsimiititaliamut suliareqqitassanngorlugu innersuupparput. Tamatumunnga atatillugu Demokraatit ersarissarusupparput, siunnersuummut akuerseqataajumagatta siunnersuut manna aningaasartuutitaqassanngimmat.

Finn Karlsen, Siulittaasup tulliaata pingajuat (A)

Qujavugut Demokraatit oqaaseqartuanut Inatsisartuni ilaasortaq Astrid Fleischer Rex-imut. Astrid Fleischer Rex-ip saqqummiussineranut tunngatillugu oqaaseqartoqarumagunangilaq, oqaaseqarniartoqarunangilaq, taamaammatt Demokraatit oqaaseqartuat Inatsisartuni ilaasortaq Astrid Fleischer Rex qutsavigissavarput, qujanaq.

Tullinguutissaaq Inatsisartuni ilaasortaq Naja Petersen, Atassut, takanna.

Naja Petersen (A)

Qujanaq.

Ilaqtariinni inuuniarnikkut isumaginnikkullu ajornartorsiutit annertulluinnaleraangata allatullu ajornarsigaangat angajoqqaat akuersitinnerisigut imaluunniit pinngitsaaliissutaasumik meeqqat inuusuttullu angerlarsimaffiup avataanut inissikkallarneqarnissaat avaqqunneqarsinnaajunnaartarpoq.

Meeqqat inuusuttullu angerlarsimaffiup avataanut inissinneqartartut sakkortuunik aqusaagaqareerlutik inissinneqartarput, angerlarsimaffiullu avataanut inissiineq immiini meeqqanut inuusuttunullu sakkortuumik misigisaasartoo qularutissaanngilaq taamaammallu taakkununga sullissinerup pitsaanerpaatinneqarnissaa aammalu toqqissisimanarnerpaatinneqarnissaa sutigut tamatigut qulakkeerniagaassaavoq pingaaruteqarluinnartoq.

Meeqqat inuusuttullu angerlarsimaffiup avataanut inissinneqartartut siusinnerusukkut pisortat pigisaannut ulloq unnuarlu angerlarsimaffinnut inissinneqartarput, maannakkulli ilisimaneqartutut namminersortut meeqqanik inuusuttunillu angerlarsimaffiup avataanut inissinneqartussanik paaqqinnikkumanerat nalinginnaaleraluttuinnarpoq.

Soorlu saqqummiussisutta oqaatigereeraa, tamanna immiini ippinnartussaartutut isiginngilarput, taamaallaalli amigaatigaarput sullissinerup pitsaassusaata qulakkeersimaneqarnissaanut inatsisitigut sinaakkutarineqartut aamma malinnaatinneqarnissaat, matumanilu tassarpiaavoq ujartugarput.

Atassummit maluginiarparput Naalakkersuisut siunnersuuterput itigarteqqullugulu akuersissutigineqassasoq inassutigigaat, soorunalumi Atassummit neriuutigaarput akuersissutigineqarnissaa anguneqassasoq.

Ilanngullugu maluginiarparput Naalakkersuisut erseqqissaatigigaat nakkutilliisarnermik annertusaaqqittoqassappat pisariaqartitat qulaajaaffigineqarnissaat pisariaqassasoq, aningaasatigut kingunerisassai ilanngullugit kiisalu suliniarneq tamanna meeqqat inuusuttullu pillugit peqqussutip aamma isumaginnittoqarfiup aqunneqarnera aaqqissuussaanelu pillugit peqqussutip pillugit aaqqissuusseqqinnermi pilersaarutaareersumi ilanngunneqarumaartoq ilimasaarisut.

Apeqqut isumarput naapertorlugu pingaaruteqarluinnartoq pillugu Inatsisartuni paaseqatigiilluni siunnerfeqaqatigiillunilu ingerlanneqartariaqartoq Atassummit isumaqarpugut, taamaammallu inassutigissavarput siunnersuut akuersaartumik suliarineqassasoq aappassaaneernejartinnagulu Inatsisartut Isumaginninnermut Ataatsimiititaliaanut suliaannagortinneqassasoq.

Finn Karlsen, Siulittaasup tulliata pingajuat (A)

Qujavugut Inatsisartuni ilaasortaq Naja Petersen, Atassutip oqaaseqartuanut, Atassutip oqaaseqartuanut oqaaseqartoqarumanerluni ? Inatsisartuni ilaasortaq Ruth Heilmann, Siumut, takanna.

Ruth Heilmann (S)

Qujanaq, tassa uagut Siumuminngaanniit oqaaseqarnitsinni Atassutip siunnersuutaa soqutigisorujussuarput, kisiannilu itinerusumik sooq taamatut inatsimmik sukateriniarnertik ersarissannimmassuk taanna amigaatigisimallugu.

Uani maluginiarpara massakkut oqaaseqarnissinni oqaatigigissi sullissinerup amigaatigigissi - sullissinerup pitsaassusaata qulakkersimaneqarnissaanut inatsisitigut sinaakkutarineqartut aamma malinnaatinneqarnissaannut, tassarpiaasorlu aamma ilissi ujartugarsi, tassa taannaavoq itinerusumik nassuiaateqarfigilaarsinnaaviuk ?

Finn Karlsen, Siulittaasup tulliata pingajuat (A)

Oqaaseqartoq Inatsisartuni ilaasortaq Naja Petersen, Atassut.

Naja Petersen (A)

Inatsisartuni ilaasortaq Ruth Heilmann, Atassut, apeqqummut qujanaq.

Tassa pingaaruteqarluinnartuuvoq soorunami Nunatsinni aamma ulloq unnuarlu angerlarsimaffiit nutarterneqartuarnerini aammalu inerisarneqartuarnerani aammalu sullissisarnerup pitsaangorsaavigineqartuarnerani aamma soorunami inatsisip ersarissumik malinnaatinneqarnissaat.

Ilaatigut soorunami ersarissumik takuneqarsinnaasariaqarpoq aamma inuiaqatigiinni toqqissimasumik, soorunami inatsisit inuiaqatigiit tamarmik aasinnaasarmatigit, inatsisini takuneqarsinnaasariaqarpoq ulloq unnuarlu angerlarsimaffiit uani namminersorlutik ingerlasut taakkua aallaavigigatsigit, taakkunani aamma qanoq sullisseriaaseq aammalu nakkutiginneriaaseq aammalu pitsaassutsip sullissinerup qulakkeersimaneqarnera qanoq inatsisinut kaputartuunneqarsimassanersoq takuneqarsinnaasariaqarpoq.

Assersuutigalugu immaqa tassa oqaatigisinnaavara aamma soorlu massakut Nunatsinni inissisimaneq aallaavigalugu ulloq unnuarlu angerlarsimaffiit arlaliupput taavalu aamma namminersorlutik ingerlasut aamma amerliartorlutik, imaaliillaannarlugu qulakkeerneqarsinnaaneq ajorpoq taakkua ulloq unnuarlu angerlarsimaffiit qanoq ittumik meeqqanut qanoq ittunut, qanorlu ikiortariaqartunut neqerooruteqarnersut, isumaqarpugut tamakkua ersarissaassutaasariaqartut aamma inatsisip sukateriffigineratigut.

Tassuuna aamma sullissisuusut imaluunniit kommunit aamma qularnaarsinnaaniassammassuk meeraq inissinneqartinnagu ulloq unnuarlu angerlarsimaffik qanoruna ittoq meeqqamut tassunga naleqqunnersoq.

Justus Hansen, Siulittaasup tullia sisamaat (D)

Taava aperisussap tullia Inatsisartuni ilaasortaq Astrid Fleischer Rex, Demokraatininnganneersoq.

Astrid Fleischer Rex (D)

Atassutikkut siunnersuutaanni arlaleriarlugu atuartaarpara qanoq siunnersuuteqarnersut paasiniarlugu, aappaatigut imatut siunnersuut paasigakku, inatsisunik allanngortitereqqaarluni piumasarsi anguneqassasoq. Aappaatigullu imatut paasillugu, inatsisit taakkua massakut atuuttut

ajunngikkaluartut kisiannili soorlu nalunaarummi imaluunniit vejledning-imi allanngortitsilaaginnarluni taakkua angorusutasi anguneqarsinnaasut.

Uagut Demokratiniit paasilluarsinnaagatsigu suleriaatsit perorsaariaatsillu namminersorlutik pigineqartunik ulloq unnuarlu angerlarsimaffinni taakku ersarissarneqartariaqartut, kikkunnullu meeqqanut inuusuttunut aamma taakku angerlarsimaffiunersut aamma ersarissarneqartariaqartoq.

Taamaammat apererusuppunga ukua inatsisit ukiut marluk pingasut atorlugit allanngornissaat taanna pivisiuk ? Imaluunniit nalunangitsunnguamik erseqqissarneqarnissaanaa pivisiuk ?

Justus Hansen, Siulittaasup tulliata sisamaat (D)

Oqaaseqartoq Inatsisartuni ilaasortaq Naja Petersen, Atassut.

Naja Petersen (A)

Qujanaq Inatsisartuni ilaasortaq Astrid Fleischer Rex, Demokratit, apeqqutinnut.

Tassa Atassummiit imatut isumaqanngilagut inatsit atuuttoq massakut imminit nammineq pitsaareermat aamma taassuma allanngortinneqarnissaa siunnerfiginngilarput, kisiannili taassumap iluani soorunami ikkussisoqarsinnaasarmat siunnersuuteqartoqarneratigut ersarissanissaq inatsimmi pioreersumi taanna pivarput.

Justus Hansen, Siulittaasup tulliata sisamaat (D)

Apeqqutiniq allanik soqanngilaq, taava Atassumminngaanniit oqaaseqartartumut qujavugut. Taava tullinnguuppoq Siverth K. Heilmann, siunnersuuteqartut sinnerlugit.

Sivert K. Heilmann (A)

Qujanaq, Atassutip siunnersuutaanut partiinit akissutigineqartunut tamanut qujavunga aamma Naalakkersuisut akissuteqaataanut itigartitsillutillu akuersaarnerannut inassuteqarnerannut.

Kisianni partiit oqaaseqartuisa soorunami akissutaat tassani qanoq isummersimanera taanna qanorlu paasinissimanerat Naalakkersuisut akissutaannut siunnersuutitalu akissutigineqarneranut taakkua namminneerlutik oqaaseqaataat takusinnaavarput qanoq nipeqarnersoq.

Kisianni Naalackersuisut sinnerlugit, qanormaa ateqarpa ? Abelsen ! Isumaginninnermut Naalackersuisup - utoqqatserpunga, akisuteqarnermini akuersilluni taavalu aamma itigartitsilluni ammaffiginnippalaarnera, matumik ikersisimanninnera Atassumminngaanniit maluginiarparput. Ajornartorsiut imaannaanngitsumik meeqqat inuusuttullu ajornartorsiutaannik oqariartuuterput aamma inatsisartut Ombudsmand-iata eqqumaffigisaa sulissutigineqarnerunissaalu matu ikersisimasutut Atassumminngaanniit nalilerparput.

Taamaammat uani oqaatigiinnassavara suliap imaannaanngitsuunera soorunami aamma Naalackersuisut suliniutaannut aamma uagut alaatsinaaqqissaassagatta suleqataassallutalu, taanna assortuussutigineqarsinnaanngilaq aamma tassuuna neriorsuutigissavara eqqumaffiginninniarnissarput taamaammat paatsuunganalaaraluartoq akissut Naalackersuisut tungaanninngaanniit qujavunga oqaatigineqartunut.

Inuit Ataqtigiit Kattusseqtigiillu Paartiiallu, paasivara oqariartuutigineqartut ataatsimoorunneqartut kisiannili siunnersuummut tunngatillugu inerniliunneqartoq akuersissutigineqanngitsoq, taamaattumillu ataatsimiititaliamut aamma ingerlanneqannginnissaa malugisinnanngilara inassutigineqanngitsoq-

Siumut oqaaseqartuata tapersersuinera malunnarneruvoq siunnersuummut aamma paasinninnera malunnarluinnarpoq, kisianni itisiliissutaasinnaasumik ujartuipput.

Aatsaaginnaq Atassutip oqaaseqartua Inatsisartuni ilaasortaq Naja Petersen-ip ersarissaateqareeraluartoq ilassuteqalaarsinnaavunga, meeqqat inuusuttullu angerlarsimaffiup avataanut inissinneqartartut nalunngilagut oqartoqareerneratigut amerlasiartortut aammalu uani saqqummiinitsinni ersersinniarsimavarput soorlu asimi siusinnerusukkut sakkortuuliornerit, tusagassiuutillu aqutigalugit oqaatigineqareersut tamatta immaqa arajutsisimagunangilagut, aallaasersortoqarnikuunera immaqa aamma taanna siulliullunilu kingulliunaviannigilaq.

Tamakkua pinngitsoortinniassagutsigit isumaqarpunga peqqussutit eqqumaffigisariaqarigut nutartertuarnissaat aammalu namminersortutut ingerlasut amerlasiartornerani isumagisassagullu

nakkutigisassagullu amerlasiortornerani sukaterinissaq naleqqussaajuarnissaq saneqqunneqarsinnaanngitsoq.

Aamma takusarparput angallatini unnuiffiusartuni soorlu Tuullik, takuneqarsinnaavoq Nuup umiarsualiviani inuusuttunnguit takanunngartarput soorlulu nammineq imminut paarisunnguit, saneqquttuarterpagut ilaatigut tamakkua eqqartorneqarsinnaapput.

Isumaqarpunga eqqumaffiginiagassagut arlalissuusinnaasut aamma ataatsimiititaliami susasaqartumi tamakkua Atassumminngaanniit siunnersuuteqarnitsinni naleqquttusoq maluginiakkani. Aamma partiit amerlanerit ataatsimiititaliami inassuteqarmata uanilu Siumut aamma taamatut kissaateqarmat assut nuannaarutigaa.

Taava Demokraatininngaanniit Astrid Fleischer Rex-ip saqqummiinera aamma tapersiinera paasinninera naak ilaatigut itisilerinissamik kissaateqaraluartoq, uani oqaatigisakka aatsaannguaq Siumup oqaaseqartuanut atatillugu innersuutiinnassavakka-

Nuannaarutigaaara ataatsimiitsitaliamut innersuussinersi tassani paasinninersi assut tuppalliutigaarput.

Atassumminngaanniit Naja Petersen-ip siunnersuummut tamakkiisumik tapersiinerat soorunami nuannaarutigaaara, aammalu suleriaqqinnissami kissaatigiinnassavarput Atassumminngaanniit ataatsimiititaliami suliap imaannaanngitsutut naleqqussartariaqalersutullu isigisatta nalilersorluarneqarnissai soorunami Nalaakkersuisoq tassani aamma suleqataalluarnissarput taanna mininneqarnaviannngimmat naatsorsuutigissavarsi suleqataalluarnissarput.

Oqaaserineqartunut partiinut Naalakkersuisullu oqaasiinut qujavunga.

Justus Hansen, Siulittaasup tulliata sisamaat (D)

Tassalu oqaaseqaatit apeqqutillu. Taava naggataarutaasumik oqaaseqaatinut. Siulliuvoq Ruth Heilmann, Siumut, takanna.

Ruth Heilmann (S)

Qujanaq Siulittaasoq.

Tassa qutsaviginiarpasi Inatsisartuni ilaasortaq Naja Petersen, Atassutip oqaaseqartuanut aammalu Atassutip saqqummiisuanut Siverth K. Heilmann-imut taamatut Siumut kissaataa itisileeqqusinermik kissaataa ersarissumik taamatut nassuiaateqarfigigassiuk. Taannalu paasilluarlugu tamakkiisumik siunnersuut Siumumingaanniit oqaatigissavara taamaalilluta annertoorujussuarmik tapersersorpassi aamma ataatsimiititaliami nuannaarutigaa amerlanerpaat aamma tapersersormassuk, tassanilu suleqatigiilluarnissarput naatsorsuutigiumaarparsi, qujanaq.

Siverth K. Heilmann (A)

Qujanarujussuaq.

Justus Hansen, Siulittaasup tulliata sisamaat (D)

Tullinguuppoq Naalakkersuisunut ilaasortaq Maliina Abelsen, takanna.

Maliina Abelsen, Isumaginninnermut Naalakkersuisoq (IA)

Qujanaq.

Naggasernerani taamatut ilanngusineq asuliinnaangilaq, tassami itigartinneqartutut akuersarneqartutullu paasineqarsinnaammat. Taamaakkaluartoq ajorpallaarunangilaq, tassami immikkoortoq una suliarissallugu assut ajornakusoorpoq.

Siullermik Atassummut qujaniarpunga, tassami pingaaruteqartorujussuaq sammitilerparsi. Atassutillu siunnersuutaat annertuumik paasinnippunga. Naalakkersuisulli itigartitsinerannut oqartoqarsinnaavoq isumannaatsumiinnissarput pissutaasoq. Tassami Naalakkersuisut suna akuerissanerlugu iluamik ilisimasimanginnamikku. Aamma aningaasatigut kingunerisinnaasai ilisimanginnatsigit.

Atassutimmi siunnersuutaa marloqiusamik paasineqarsinnaavoq. Imatut paasineqarsinnaavoq meeqqanut inuusuttunullu Inatsisartut peqqussutaat peqartoq ersarinnerussasoq, assersuutigalugu allassimassalluni Namminersorlutik Oqartussat ulloq unnuarlu paaqqinnittarfinnik akuersisartuusut nakkutilliisullu. Tassami Namminersorlutik Oqartussat taamaapput. Tamanna inatsisini ersarinnerusariaqarpoq ersarinnerussallunilu, tamannalumi aamma Naalakkersuisoqarfimmi sulissutigalugu aallartereerparput. Tassami qanoq ittoqaraluarpalluunniit tunngaviatigut

Namminersorlutik Oqartussat nakkutilliisussaapput, aamma tamanna inatsimmi allassimannikkaluarpalluunniit. Tassanili allassimasariaqaraluarpoq.

Siunnersuut imatut paasineqassappat inatsit nalunaarullu sukateriffigineqassasoq, imatullu allassimalerluni ulloq unnuarlu angerlarsimaffiit, Namminersorlutik Oqartussanit pigineqartut aamma namminersortunit pigineqartut, assersuutigalugu akulikinnerusumik nakkutilliivigineqartassasut, angerlarsimaffiit qanoq aaqqissuunneqartassanersut allallu piumasaqaatit, taava tamakku aningaasatigut kinguneqartussaassapput, taamaattuminguna tassuuna tunuarsimaartunga naatsorsoqqaartussaassammata.

Tamanna tunngavigalugu siullermik itigartitsisunga, siunnersuut taamatut paasineqassappat aningaasaqarnikkut tamanna qanoq kinguneqarsinnaanersoq paaseqqaarusukkakku. Uagut aamma isumaqarpugut nakkutilliinermut tunngatillugu annertuumik suliassaartoq.

Eqqaamassavarpummi meeqqat inuusuttullu ulloq unnuarlu angerlarsimaffinni inissinneqarsimasut, taakkuupput imminut illersorniarlutik nammineq nukissaqanngitsut, taamaattumik pisortat tungaanniit immikkut pingaaruteqarpoq akisussaaffigissallugit aamma inuit taakku pitsaasumik toqqissisimasumillu atugaqarnissaat isumagalugu.

Taamaattuminguna Atassutip aalajangiiffigisassatut siunnersuutaa assut nuannaarutigiga assut pingaaruteqartumik isiginnitsilermat.

Atassutip siunnersuuta imatut paasineqassappat Namminersorlutik Oqartussat ataanni ulloq unnuarlu angerlarsimaffinnut aamma ulloq unnuarlu angerlarsimaffinnut namminersortunit pigineqartunut piumasaqaatit ersarinnerulernissaat kissaatigineqartoq. Tassunga oqaatigisinnaavara Isumaginninnermut Naalakkersuisoqarfimmi maannangaaq ilitsersuutip pitsaanerulersinnissaanut sulineq aallartereermagu, taamaalilluni ulloq unnuarlu angerlarsimaffinnut amerlanerusunut piumasaqaateqalerluni.

Tamanna nalunaarummi allassimannigilaq, kisiannili ilitsersuummi nutaamiissalluni, tamannalu pitsaasumik alloriarneruvoq.

Taamaattumik immikkoortoq tassunga tunngasoq akissuteqaatiliorfigissallugu assut ajornakusoorsimavoq. Taamaattumik oqaatigiuminaappoq Atassut isumaqarnersoq siunnersuutip siunertaa naapertorlugu ilumut ajunngitsup tungaanut ingerlanersugut.

Siunnersuut imatut paasineqassappat inatsit ersarinnerulissasoq, Namminersorlutik Oqartussat nammineq pigineqartunik nakkutilliisuusassaataasoq, taava taanna naammassilerpoq.

Siumut nakkutilliinermik suliaqarnermik nalilersuisussamik suleqatigiissitaq pillugu apeqquteqarpoq. Taanna Naalackersuisoqarfiup iluani suleqatigiissitaavoq nakkutilliisarneq pitsaasumik ingerlaneranik sammisaqartoq, kommuninik suleqatiginninneq qanoq ingerlanersoq, tassanimi aamma Namminersorlutik Oqartussat kommunillu akornanni suleqatigiiffissaqarpoq.

Demokraatit kissaatigivaat perorsaanikkut sulineq imaluunniit angerlarsimaffinni aallaaviusut nalunaarummi ersarinnerulernissaat. Maannakkut tamatuma ilitsersuummi ersarinnerulernissaa sulissutigineqarpoq. Imaassinnaavoq tamanna aamma nalunaarummi allassimasariaqaraluartoq, taamaaliortoqarsinnaavorlu.

Taamaattumik tunngaviatigut ammaasoqarpoq, annertuumik ammaasoqarpoq, suna uagut suliassarinerippat inatsimmi ersarinnerusumik allassimalernissaanut.

Peqatigisaanilli Naalackersuisut itigartitsippat tassami siunnersuut aamma atuarneqarsinnaammat nalunaarut suli annertunerusunik suliaasinnaasunik imaqartariaqartoq.

Qujanaq.

Justus Hansen, Siulittaasup tulliaata sisamaat (D)

Apeqquteqarnissaq ammarpoq. Aperisussaq siulleq tassaavoq Siverth K. Heilmann, Atassut.

Sivert K. Heilmann (A)

Qujanaq Aqutsisoq.

Uani ersarissarniaannarparput saqqummiinitsinni namminersortut amerlasiartornerannut tassa angerlarsimaffiup avataani inissinneqartarnerannut atatillugu oqariartuutigisagut ersarissorujussuummata annerusumik taakkua pinerugigut aammalu asimi assersuutigalugu

sakkunik ulorianartunik atuilluni tamakkua sakkortusiartuinnassanngippata iliuuseqarsinnaanissaq naleqqussaanaissaq annerpaamik ujartoripput, taamaammat uani pingasoqiusanik innersuussutigisagut siunnersuutitta naalernerani tunngavilersuutigisatta ataani innersuussutigiinnassavakka, taakkua aningaasarpassuarnik naleqartussaanaaviangillat isumarput malillugu.

Taamaammat ataatsimiititaliami taakkua partiit oqariartuutaat uagullu oqariartuutigisagut isumaqarpunga nalilersorneqarunik isumaliutissiissummi aamma saqqummertoqarneratigut ersarissumik Naalakkersuisuni inassuteqarumaartugut, qujanaq.

Justus Hansen, Siulittaasup tulliata sisamaat (D)

Qujanaq, ilassutissaqarpa. Isumaginninnermut Naalakkersuisumut qujanaq, aperisussaq tulleg tassaavoq Naja Petersen, Atassut.

Naja Petersen (A)

Qujanaq.

Naalakkersuisumut apeqqutigilaarusuppara naak aallartinnermini naggasiinini oqaaseqarfigilaaraluaraa, apeqqutigerusuppara ilaatigut oqaaseqarninni Inatsisartut Ombudsmandiat saqqummiussatsinnut attuumassutilerujussuarnik aamma soqutiginninnerminik takutitsisimasoq aammalu taanna aallaavigalugu Naalakkersuisoqarfik akisummik massakkut suliaqaleruttortoq, Inatsisartut Ombudsmandianut taavalu aamma oqaaseqarnerpit ilaani aallarteqqammerninni ilaatigut aamma oqaatigivat, ulloq unnuarlu paaqqinniffinni imminnut pigisunik pilersitsinermi periutsit ersarissarneqalersimasut aammalu paaqqinniffinnik nutaanik akuersissutiginninnermut atatillugu ilaatigut tamakkua ilitsersuutit nutaat 2009 ingerlanerani piareerneqarumaartut, taamaammat imatut paasisinnaavara siunnersuuterput Naalakkersuisup taperseraa ?

Justus Hansen, Siulittaasup tulliata sisamaat (D)

Naalakkersuisoq.

Maliina Abelsen, Isumaginninnermut Naalakkersuisoq (IA)

Aap, imatut paasineqarsinnaavoq imatut tapersiisoqartoq, ilitsersuut 2009-mi naammassineqassaaq, tassa immikkoortoq pillugu isiginnittoqarsimammat ilitsersuut pisariaqartinneqarluni

paaqqinnittarfiit nammineq pigisut tassani ersarinnerulerlutik paaqqinnittarfinnillu taakkununga amerlanerusunik piunasaqaateqartoqarluni.

Taamaattumik neriutigaara imaluunniit naatsorsuutigilluinnarpara ilitersuut taanna pissutsinik sukaterissasoq.

Justus Hansen, Siulittaasup tulliata sisamaat (D)

Aperisussaq tulleeq. Immikkoortoq tamaanga killeqartinniarpara amerlanerussuteqartoqarmat. Kingulleq tassaavoq Ruth Heilmann, Siumut.

Ruth Heilmann (S)

Qujanaq, taanna apeqqutiginiagara aatsaannguaq Atassutip oqaaseqartuaniit Inatsisartuni ilaasortaq Naja Petersen-ip apeqqutigaa, tassa siunnersuut ersarissumik tapersersornerlugu tapersersunnginnerluguluunniit, taanna oqaaseqarfigilaaqqullugu.

Kisianni uanga paaserusuppara meeqqat inuusuttullu angerlarsimaffiup avataanut inissinneqartartut sullinneqarnerisa nakkutigineqarnerat sukateriffigineqaqqullugu imaluunniit sukateriffigissallugu Naalakkersuisut qanoq pileraaruteqarfigineraat. Massakkut Atassutip oqaaseqartuata Inatsisartuni ilaasortaq Siverth K. Heilmann-ip oqaaserisai aallaavigalugit tassuunakkut qanoq eqqarsaatersuuteqarnersut ?

Justus Hansen, Siulittaasup tulliata sisamaat (D)

Naalakkersuisoq.

Maliina Abelsen, Isumaginninnermut Naalakkersuisoq (IA)

Soorlu siuliani oqartunga nakkutilliinermi piunasaqaatit ersarissarlugit Naalakkersuisoqarfik aallartereerpoq, inatsimmi ersarinnulersitsineq isumaqanngilaq taava annertunerusumik sukaterisoqartoq. Tassaniiporlu assigiinngissutaa, imatut annertutigisumik sukaterisoqassappat assersuutigalugu qaammatit pingasukkaarlugit assigisaanilluunniit nakkutilliisoqartalerluni. Taamatut ersarinnerulersitsisoqassappat, taava tamanna allanut naleqqiullugu aningaasatigut kinguneqassaaq uterlunga misissoqqaagassannik.

Imatulli paasineqassappat inatsimmi taamaallaat ersarissaasoqassasoq, aap paaqqinnittarfinnik nammineq pigineqartunik Namminersorlutik Oqartussat nakkutilliisussaasut, taava taanna suliaq aallartinneqareerpoq.

Justus Hansen, Siulittaasup tulliata sisamaat (D)

Qujanaq. Aperisussarlu kingulleq Astrid Fleischer Rex, Demokraatit.

Astrid Fleischer Rex (D)

Maliina Abelsen, Isumaginninnermut Naalakkersuisoq, Inuit Ataqatigiit, oqarmat, ilitsersuutitigut maannakkut naammassilereersoq ersarissarneqarnissaa.

Ilitsersuummiiginnarpat ilitsersuutaannaavoq, uagut Demokraatini pingaartikkiptut ilumut tangeqassappat, taava nalunaarummiittariaqarpoq, nalunaarummiissappat taanna uagut imatut paasivarput, ulloq unnuarlu angerlarsimaffiup nammisortup namminersorluni pigisaqartup, imaappoq nunatta piginnigisaat kisianni inuit namminersortut pigisaat, tassani akuerissagutsigu Namminersorlutik Oqartussaninngaanniit soorunalimi aamma perorsaataat, suna perorsaariaaseq atussaneraat tassani allassimaqqullarigaluaripput uagut Demokraatininngaanniit.

Maannakkummi taakkununga inissittakkagut kommunininngaanniit meeqqat inuusuttullu artornarnerpaarpat taakkununga inissinneqartarput. Taamaammat pingaartorujussuuvoq nalunaarummiinnissaa piumasarissallugu suna perorsaariaaseq taakkununga artornartorujussuarnut imaluunniit pinerlunneqarnikorujussuarnut meeqqanut atorniarpisiuk?

Justus Hansen, Siulittaasup tulliata sisamaat (D)

Naalakkersuisoq.

Maliina Abelsen, Isumaginninnermut Naalakkersuisoq (IA)

Tamanna ilumoorpoq, tamanna ilitsersuummi allassimassimassanersoq, taava oqallisigineqarsinnaavoq tamanna naammannersoq, apeqqullu taannarpiaq uani pingaartuulluni. Peqqussummi qanoq pulatigissuugut, qanoq annertutigisut allassimassappat. Tassanilu uanga tunuarsimaarpunga Naalakkersuisummi isumaqataanissaannut apeqqutaavormi tamanna qanoq kinguneqassanersoq.

Justus Hansen, Siulittaasup tulliaata sisamaat (D)

Isumaginninnermut Naalackersuisumut qujavunga imatullu inerniliillunga immikkoortoq 62

Ilaqtariinnermut Ataatsimiititaliami aappassaaneerneqarnissaanut suliarineqassasoq. Qujanaq.

Immikkoortoq 52-imut ingerlaqqippugut.